

պահ պարոններ, սրանք միմյանց հետ պատերազմ սկսեցին իրենց իշխանության համար և գնացին Կարին ավագ իշխանավորի մոտ, որ մեծ փաշան է, որպեսզի դատի իրենց: Կարսը մնաց առանց իշխանավորի: Խանը այս լսելով՝ հավաքեց զորքը, տվեց քալանթար Մասումին և ուղարկեց Կարսի գավառը ու պատվիրեց նրան, որ թե քրիստոնյա գերես, խաղաղությամբ կբերես, իսկ եթե մահմեդական գերես, տղամարդկանց կկոտորես, կանանց կզերես և շեները կայրես ու կավերես: Այս պատվերը տվեց նրան, իսկ ինքը զորքն առավ գնաց Կաղզվանի<sup>95</sup> կողմերը և բոլոր վայրերը գերեց ու ավերեց: Հասավ մինչև հին քաղաք Բագրևանդ<sup>96</sup>, որ այժմ կոչվում է Չառաֆխանա Երասխ գետի ափին: Գերեց բնակիչներին, քանդեց շեները, որոնք ավեր մնացին մինչև այսօր: Գերիներին ուղարկեց Վաղարշապատ<sup>97</sup>: Գնաց հասավ մինչև Կարնո գավառը և գերեց, ինչ որ գտավ: Շուտ եկավ Բասենի<sup>98</sup> և Պարտիզաձորի<sup>99</sup> վրա և եկավ Կարսի դուռը, և այն, ինչ մնացել էր Մասումի գերեվարներից, այն էլ խանը գերեց: Քանզի օսմանցիք չկարողացան դիմադրել, որովհետև ավագակները, որ ջալալիներն են, բազմացան հայոց փոքր Կողոնիայում՝ այսինքն՝ Շապղարասար (Շապինգարահիսար): Եվ օսմանցիների Մուրադ թագավորի հրամանով նրանց դեմ գնաց Կարնո փաշան, իսկ երկիրը մնաց անտեր, ուստի պարսիկները զոքացան և այս ամենը արեցին:

**ԳԼՈՒԽ ԽԲ**

**ՄԱՀՄԵԴԻ ՇԵՅԽԻՍԼԱՄԻ ՊԱՏԻԺԸ**

Քանաքեռցի Միքայել անունով մի եպիսկոպոս կար: Սա այն Միքայել արեղան է, որին Մեխլուի պատմության մեջ հիշատակել են: Մի մարդ էր երկայնահասակ, պակասախելք, գրքերի մեջ սգետ, իսկ աշխարհիկ խոսքի մեջ ճարտար: Սա ունեցավ մի պարսիկ թշնամի: Սա ասում էր՝ ես քո ազգականն եմ, ինչ որ դու ունես, ամենն էլ ինձ է հասնում, քանզի ես մահմեդական եմ և մեր օրենքները այսպես են տնօրինում: Եվ շատ անգամ հայիոյում էր եպիսկոպոսին՝ ասելով անաստված, հայիոյիչ, անհավատ, պիղծ: Այսպես երկուսի միջև կռիվ ու զգվռոտոց էր: Երկուսն էլ գնացին դատա-

վորի մոտ դատաստանի: Պարսիկը կարծում էր, թե ինքն է ճշմարիտ և պարծենում էր իր մահմեդականությամբ: Գնացին կանգնեցին շեյխի առջև: Պարսիկն ասաց՝ Միրզա, ես այս քրիստոնյայի ազգից եմ և մահմեդական եմ և ըստ օրենքի ապարանք եմ պահանջում սրանից, իսկ սա չի տալիս: Շեյխը հարցնում է եպիսկոպոսին, թե իրո՞ք սա քո ազգից է: Եպիսկոպոսը պատասխանում է՝ ես դրան ոչ գիտեմ, ոչ էլ ճանաչում եմ: Եթե դա իմ ազգից է, թող վկաներ բերի և ապացուցի ձեր առջև իր ազգակցությունը և իրենց լինի իմ ողջ գույքը: Շեյխը հարցնում է պարսիկին՝ վկաներ ունե՞ս, որ դրա ազգակիցն ես: Մահմեդականն ասում է՝ իմ վկան իմ հավատն է: Շեյխը ասում է՝ շատ են այդ հավատ ունեցողները, բայց դա չի օգնի: Եթե վկաներ ունես, կբերես, իսկ եթե չունես, մի չարչարիր որևէ մեկին, քանզի առանց վկայի ոչինչ չես շահի: Պարսիկը ելավ գնաց Քանաքեռ, որպեսզի Քանաքեռի մահմեդականներից վկաներ բերի: Բայց նրանք չեկան, այլ անարգեցին նրան: Իսկ դատավորը թուղթ գրեց, տվեց եպիսկոպոսին շատ մահմեդականների վկայությամբ և կնիքով, մահմեդականին սուտ դուրս բերին:

Եպիսկոպոսը առավ դատավճիռը և գնաց: Մի ամիս հետո պարսիկը դարձյալ եկավ շեյխի մոտ և ասաց՝ մի անվարտիք սևազլխի համար ինչո՞ւ ամոթով թողիր և սուտ հանիր ինձ: Արդ՝ ես քեզ այսքան փող եմ տալիս, և դու իմ խոսքը ճշմարտիր: Իսկ դատավորը լսեց նրան, որովհետև կաշառքը կուրացնում է դատավորների աչքերը: Դատավորը կաշառքը առնելով՝ նրան թուղթ տվեց և նրան դարձրեց եպիսկոպոսի ազգական: Մահմեդականը թուղթը առավ, գնաց նստեց եպիսկոպոսի այգին: Իսկ եպիսկոպոսը գնաց շեյխի մոտ և ասաց՝ այս ի՞նչ բան է, բազմաթիվ մարդկանց վկայությամբ այս դատավճիռը ինձ տվիր, իսկ այժմ նրան իրավունք ես տվել, և ահա եկել նստել է իմ այգում: Շեյխը ասում է՝ ես ճիշտ վերահասու չեի իրողությանը, իսկ այժմ հավաստի իմացա, որ նա քո ազգականն է, և ըստ մեր օրենքի քո ամեն ինչը նրան է պատկանում: Եպիսկոպոսն ասում է՝ երբ քեզ կաշառք չէր տվել, ինձ ազգական չարիր, այժմ կաշառք առար և ինձ ազգական դարձրիր: Դատավորը բարկացավ, ծառաներին հրամայեց՝ նրան դուրս հանել: Եվ ծառաները հրելով նրան՝ պալատից հանեցին: